

Nuwe Lied Bediening



Hy het 'n nuwe lied in my mond gegee, 'n lofprijsing tot ons God sodat baie dit sal sien en respekvol vrees en op Yahuah vertrou. Ps.40:3.

Wanneer ons die Torah bestudeer moet ons onthou dat Yeshua, dié Gesalfde Een, die boodskap van יהוה-God is wat vlees geword het! Hy is die weg na die waarheid wat lewe gee – die Lewende ‘man hu’ wat uit die hemel gestuur is en יהוה se Torah vervolmaak het. Sonder die Afgesonderde Gees wat in ons, en deur ons lewe, sal die geskrewe Torah net die dooie letter van die wet wees!!

Yeshua is die hart van die Vader!!

Parashah 42: Mattot – Stamme

Mosheh het met die hoofde van die stamme van die kinders van Yisra'el gepraat en gesê:
 “Hierdie is dit wat יהוה beveel het”. Num. 30:1 – PWL¹

Torah : Num. 30:1 tot 32:42

Haftorah: Jer. 1:1 tot 2:3

Nuwe Verbond: Matt. 5:33 tot 37; Hand. 5:1 tot 11; Gal. 5:19 tot 23; Kol. 3:5 tot 8.

Hierdie notas is aanvullend tot vorige notas vir Parashah 42 wat afgelaai kan word by:
http://nuwelied.info/?page_id=1182.

What Do You Believe?

I asked this question: 'why is it so easy for people to believe in lies?' Why? Because lies appeal to the carnal and fleshy mind. Truth must be received in the spirit of a person for it to become reality to a person. If truth is continually seen as the enemy, it will never be embraced by people. Lies are easily believed because they creep in slowly, and before a person knows it, they are believing in something they would have otherwise immediately rejected if it had come right up to them and introduced itself saying, "My name is Lie."

Truth is rejected often times by people, because it does not conform to what they have always been taught. Truth DOES make itself known upfront saying, "My name is Truth!" It doesn't care if it is received or not because it cannot be anything other than what it is. Truth wears no mask or disguise. Truth parallels the light. Light cannot creep in slowly, as hiding under a cloak. Light is either on or off; opposed or accepted; ran from or received. This is the nature of truth. And as Messiah referenced, “do not hide it under a barrel, but place it on a table so that all who enter the house can enjoy its light.” (The Well Trodden Road)

Die volledige artikel is beskikbaar by: <http://www.thewelltroddenroad.org/what-do-you-believe/>

¹ Alle teksverwysings is geneem uit PWL (Pad van Waarheid tot die Lewe) Vertaling (www.padwlewe.ch), behalwe waar anders vermeld. Om 'n kopie van die Bybel te bekom kan Gerrie Coetzee per e-pos by gerrie@padwlewe.ch gekontak word of telefonies by 074 361 2134.

Though he had so much work to do with others, yet Yeshua chose sometimes to be alone, to set us an example – Matthew Henry.

Torahbespreking

Hersiening

In verlede week se Torahskriflesing het ons geleer van die ywer en jaloesie van Pingas wat vir ons ‘n sinnebeeld is van die ywer en jaloesie wat ons elkeen ook behoort te hê, want dit is die ywer vir יהוה ons Vader-God en vir Sy onpartydige opregtheid. Pingas het met יהוה se jaloesie onder Yisra’el opgetree.

In hierdie voorlaaste parashah van Numeri is die Y’hoshua-generasie op die punt om oor die Yarden te trek en die beloofde land, Kena’an, in besit te neem. Hierdie is geen maklike taak nie, want Kena’an word bewoon deur ses heidense volke wat oorwin sal moet word (Ex. 34:11-16) en verder sal Yisra’el getoets (beproof) word om te sien of hulle uit die foute van hulle ouers en uit hul eie foute geleer het. Het hulle van die slawementaliteit ontslae geraak? Yisra’el was uit Mitzrayim, maar was Mitzrayim uit hulle? Het hulle geleer om יהוה in alles gehoorsaam te wees en in alles te vertrou? Is hulle gereed om die belofte wat God aan hulle vader Avraham gemaak het (Gen. 15:7 en 18-21) in besit te neem?

Noudat Yisra’el aan die einde van hulle swerftog in die wildernis gekom het, kan ons ook vra of hulle met dieselfde gesindheid as Pingas gaan optree wanneer hulle Kena’an in besit gaan neem?

In die lig van voortsnellende wêreldgebeure en Skrifprofesie dui alles daarop dat, soos Sha’ul dit in 1Kor. 10:11 stel, die einde van die wêreld by ons aangekom het. Soos Yisra’el van ouds staan ons ook op die punt om nuwe uitdagings en beproewinge van ons geloofswandel te betree. Is jy en ek gereed daarvoor? Het ons geleer hoe om die toekoms, wat in vele opsigte onseker is, met vertroue in te stap? Is ons die geslag wat van wie gesê sal word “en hulle het hom oorwin deur die bloed van die Lam en deur die boodskap van Sy getuienis en hulle het hulle lewe, tot die dood toe, nie liefgehad nie” (Open. 12:11)?

Soos Yisra’el van ouds is daar ‘n deurtog deur ‘n ‘Yardenrivier’ wat op ons wag. Ons vertroue in יהוה se onverdiende guns in Yeshua gaan getoets word soos nooit van te vore nie! Soos eindtydgebeure voor ons ontvou moet ons egter onthou: “Things are not falling apart; they are falling in place”.

‘n Baie ou Romeinse slagspreuk is: *If you want peace; prepare for war!* Daarom gaan ons geestelike gereedheid deurslaggewend wees in die tye wat op hande is!

In hierdie week se Torahskriflesing word daar ondermeer gefokus op God se gedelegerde gesag!

יהוה Deleger Sy Gesag

Die naam *mattot* van hierdie week se Torahskriflesing verwys na die hoofde van die twaalf stamme as die gesagsowerhede wat oor Yisra’el aangestel is. Daarom is die betekenis van *mattot* ook ‘n *staf*, verwysend na outoriteit (gesag), asook as ‘n *tugroede* of *meetroede*. Mosheh het dus met die aangestelde gesagsowerhede van Yisra’el gepraat en aan hulle die laaste onderrig gegee voor Yisra’el die beloofde land in besit sou neem. Hierdie stamhoofde moes dien as voorbeeld van Torahgehoorsaamheid. Hulle moes die tugroede en meetroede

volgens Torah in regverdigheid toepas! Maar hulle moes ook onthou dat *Authority does not make you a leader. It gives you the opportunity to be one..!*

Regdeur die Skrifte sien ons talle voorbeelde van יהוה wat Sy gesag (outoriteit) aan mense delegeer en hulle dan aanspreeklik hou vir die hantering en toepassing daarvan. Gedelegerde gesag is om die volmag te ontvang om namens die persoon aan wie die gesag behoort, op te tree ten opsigte van, of in bepaalde situasies soos volgens die voorgeskrewe riglyne van die een aan wie die gesag behoort. Gedelegerde gesag bring altyd verantwoordelikheid en aanspreeklikheid teenoor die een aan wie dit behoort.

Daarom moet יהוה se gedelegerde gesag altyd binne die raamwerk (grense) van Torah hanteer en toegepas word. Die een aan wie יהוה die gesag gee moet uiteraard self onderdanig wees aan יהוה se onderrig en instruksies soos dit in Yeshua volbring is.

Die eerste voorbeeld van יהוה se gedelegerde gesag vind ons in die tuin van Eden toe יהוה aan die mens die gesag gegee het om te heers oor Sy skepping:

God het gesê: “Laat Ons die mens maak na Ons beeld, net soos Ons en laat hulle heers oor die visse van die see, die voëls van die hemel, die vee en oor die hele aarde en oor al die diere wat op die aarde beweeg.” Gen. 1:26.

Ons sien ook hierdie gedelegerde gesag in Gen. 2:15 toe יהוה aan die mens gesê het om die tuin te om te spit (te bewerk) en te beskerm (bewaak).

Toe het יהוה-God, die mens gevat en hom in die tuin van `Eden gesit om dit om te spit en te beskerm. Gen. 2:15.

יהוה het aan die mens die gesag gegee om namens Hom om te sien na Sy skepping deur dit eerstens *om te spit (te bewerk)*. Die Hebreeuse woord is *avad* en beteken om as dienskneg te arbeid. En tweedens, om יהוה se skepping *te beskerm (te bewaar)*. Die Hebreeus is *sh'mar*, naamlik om dit te beskerm op 'n wyse dat dit behoue sal bly.

Die Hebreeus vir *heers* is *radah* en beteken om יהוה se Skepping tot onderdanigheid (diensbaarheid) aan יהוה te bring. Die klem is egter op diensbaarheid. Dit moet gesien word in die lig daarvan dat alles wat יהוה geskape het 'n doel dien. Die mens moet dus op 'n wyse heers sodat die doel van alles wat יהוה geskape het tot nut van alles wat geskape is, sal wees en sonder dat dit wat God geskape het tot niet sal gaan. Opgesom: Aan die mens is die gesag gegee om die Skepping te bewerk en dit te bewaar!!

יהוה-God het hierdie gedelegerde gesag nooit teruggetrek nie en daarom sal die mensdom tot die oordeelsdag aanspreeklik gehou word vir die wyse wat hierdie gesag gebruik was – of eerder misbruik was!

Die sondeval was die begin dat die mens op die *bewerk* die klem gelê het (en met tyd nie meer tot voordeel van almal nie, maar vir eie gewin) en dat die *bewaar* toenemend agterweë gebly het! Daarom is die wêreld vandag in die situasie waar natuurlike hulpbronne toenemend uitgeput word en sommige reeds feitlik totaal uitgeput is. Die mensdom is grootliks op 'n pad van selfvernietiging! Die rede? Die mensdom het die aarde bewerk, maar nie bewaar nie!

Dit is ook belangrik om te verstaan dat die mens nie aangestel is om oor ander mense te heers (*radah*) nie. Nee, want יהוה is die Oppergesag en Hy alleen heers deur Yeshua oor alle mense. Diegene wat Yeshua wel oor ander aangestel het, moet heers deur dié te dien oor wie hulle aangestel is!! Yeshua is ons voorbeeld:

25 Yeshua het hulle geroep en vir hulle gesê: “Julle weet dat die heersers van die nasies baas speel oor hulle en die leiers outoriteit het oor hulle,
 26 maar só moet dit onder julle nie wees nie, maar elkeen wat onder julle groot wil word, moet julle dienaar wees
 27 en wie ook al tussen julle die eerste wil wees, moet julle slaaf wees;
 28 net soos die Seun van die mens nie gekom het om bedien te word nie, maar om te dien en Homself as ’n Losprys vir baie te gee.” Matt. 20:25-28.

Dit is in die lig van bogenoemde wat die twaalf stamme as die gesagsowerhede oor Yisra’el aangestel was. יהוה het Sy gesag aan Mosheh gedelegeer wat ’n sinnebeeld is van die gesag wat God aan Yeshua gedelegeer het. En Mosheh het Sy gesag eerstens aan Y’hoshua gedelegeer (Num. 27:12-23), en nou aan die twaalf stamhoofde, wat weer ’n sinnbeeld is van Yeshua wat Sy gesag aan die twaalf Apostels (Afgevaardigdes) gedelegeer het.

Hierdie gesagstruktuur bestaande uit Y’hoshua en die twaalf stamhoofde het die taak gehad om onder hulle leiding Kena’an in besit te neem. Dit het behels om die vyande van God en Yisra’el te oorwin, asook om die land wat vloei van melk en heuning te bewerk en te bewaar.

God het aan die leierskap, en aan Yisrae’el as volk, die gesag gegee om namens Hom en volgens Torah om te sien na die land wat Hy as Sy Koninkryk gekies het. Hulle moes dit *avad* (bewerk) en *sh’mar* (beskerm; bewaar), naamlik op ’n wyse dat dit behoue sal bly tot voordeel van die nageslagte. Hulle moes oor die land *radah* (heers), naamlik om יהוה se Skepping tot onderdanigheid (diensbaarheid) aan Hom te bring.

Hierdie is alles ’n sinnebeeld van die Koninkryk van God van die nuwe verbond. Ons het elkeen dieselfde taak as Yisra’el van ouds toe hulle Kena’an in besit gaan neem het om יהוה se Koninkryk daar te vestig. Ons moet ook as arbeiders in יהוה se Koninkryk dit bewerk, bewaar en daarvoor heers onder die gesag van Yeshua ons Meester. En die doelwit moet wees om alles te doen tot voordeel van elkeen wat deel is van God se Koninkryk in Yeshua, dié Gesalfde Een!

Daarom dien hierdie Torahskriflesing ook as herinnering dat יהוה die Oppergesag is – die Wetgewer wat alle natuurwette en geestelike wette geskep het en wat dit alles in stand hou deur die Boodskap van Sy wonderwerkende krag (Heb. 1:3), naamlik Yeshua, die Boodskap wat vlees geword het (Joh. 1:14). Dit dien ook as herinnering dat יהוה deur Yeshua Sy gesag deleger aan diegene wat bereid is om onder Sy gesag te staan.

Maar ons word ook daaraan herinner dat יהוה sekere gesagstrukture geskep het waarin die mens ‘outomaties’ aangestel word. Een so ’n voorbeeld is die feit dat יהוה sy gesag aan die man as die hoof van die huis gedelegeer het.

Die man moet dus as die hoof van die huis op dieselfde wyse oor sy huis heers as wat Yeshua oor die gemeente heers, naamlik deur sy vrou en kinders te dien deur “die bewerk en bewaarder” van hulle lewens te wees. Die huisgesin is יהוה se Koninkryk in die klein! Die man as hoof van die huis moet heers deur sy gesin te dien! Sha’ul verduidelik יהוה se gesagstruktuur in gesinsverband in Efes. 5:22-33.

יהוה ons Vader en God is die hoof van Sy huis en huishouding. Wanneer ons gehoorsame kinders van יהוה is, sal ons ook soos Dawid kan sê:

U goedheid en onverdiende guns sal my sekerlik volg al die dae van my lewe en ek sal vir ewig in die huis van יהוה bly. Ps.23:6.

Geloftes en Eedswering

In die lig van bogenoemde kan ons Num. 30:1-16 verstaan, naamlik die onderrig en instruksies oor geloftes en eedswering wat deur vroue gemaak word.

Eerstens leer Torah ons dat 'n persoon (almal) wat 'n gelofte doen of 'n eed sweer wetlik en moreel verplig is om daarvolgens te handel.

Wanneer iemand aan יהוה 'n gelofte doen of 'n eed sweer waardeur hy homself tot iets verbind, moet hy sy woord nie breek nie; hy moet alles doen wat uit sy mond uitgaan. Num. 30:2.

Dit is egter belangrik om die verskil tussen 'n gelofte en 'n eedswering te verstaan, naamlik:

- ❖ 'n Gelofte (Hebreeus: *nader*) is 'n vrywillige belofte (gewoonlik aan יהוה) waarvolgens nougeset gehandel moet word, want dit is bindend en vergelykbaar met 'n skuldbrief ('n verpligting, 'n verband, 'n obligasie, 'n pandbrief).
- ❖ 'n Eedswering (Hebreeus: *sh'buah*) is 'n gelofte wat gemaak word in die teenwoordigheid van die hoogste gesag wat as getuie teenwoordig is. Dit is 'n verklaring van die waarheid, naamlik van dit wat was, dit wat is en van dit wat sal wees. Die Hebreeus is afgelei van *shevah* wat sewe beteken en dus na die volmaakte verwys. Eedswering is dus gelykstaande aan 'n gelofte wat jy sewe keer maak!!

Geloftes en eedsweringe is dus woorde wat uit ons mond gaan en daarom moet ons alles doen wat ons sê. Deut. 23:21-23 dien as bevestiging van Num. 30:2, naamlik:

21 Wanneer jy aan יהוה, jou God, 'n gelofte doen, moet jy nie uitstel om dit te betaal nie, want dit sal sonde in jou wees en יהוה, jou God, sal dit sekerlik van jou vereis;

22 daarenteen, as jy nalaat om te belowe, sal dit geen sonde in jou wees nie.

23 Jy moet versigtig wees om te doen wat oor jou lippe gaan, net soos jy aan יהוה, jou God, vrywillig oorgegee het, wat jy beloof het.

Wanneer jy aan God, 'n gelofte doen, moet jy nie uitstel om dit te betaal nie, want dit sal sonde in jou wees en Hy sal dit sekerlik van jou vereis; daarenteen, as jy nalaat om te belowe, sal dit geen sonde in jou wees nie. Jy moet versigtig wees om te doen wat oor jou lippe gaan, net soos jy aan יהוה vrywillig oorgegee het, wat jy beloof het.

Tydens Yeshua se bergpredikasie het Hy ook na geloftes en eedsweringe verwys toe Hy gesê het:

33 Verder het julle gehoor dat aan die mense van die ou tyd gesê is: 'Jy moenie jou eed verbreek nie,' en, 'jy moet jou beloftes aan יהוה hou,'

34 maar Ek sê vir julle: 'Lê hoegenaamd nie 'n eed af "by die hemel" nie omdat dit die troon van God is;

35 ook nie "by die aarde" nie omdat dit Sy voetstoel is; ook nie "by Yerushalayim" nie omdat dit die stad van die groot Koning is

36 en moet ook nie by jou kop 'n eed aflê nie omdat jy nie een haar wit of swart kan maak nie.

37 Laat slegs julle 'Ja' 'n eenvoudige 'Ja' wees en julle 'Nee' eenvoudig 'Nee'. Enige iets meer as dit het sy oorsprong in die Bose een.' Matt. 5:33-37.

Elke mens is gebind deur die woorde van sy mond! Dit is die wysheid van Shlomo toe hy ook gesê het:

19 Die bouse kan nie bevry word deur 'n oorvloed van woorde nie, maar hy wat sy lippe inhou, is wys.

20 Die tong van die regverdige is soos uitgesoekte silwer; die verstand, wil en emosie van die bouse is vol bitterheid.

21 Die lippe van die regverdige is vol onverdiende guns, maar die dwase sterf deur die gebrek aan wysheid. Spr. 10:19-21.

En dat:

20 'n Man se maag sal versadig word deur die vrug van sy mond en deur die vrug van sy lippe sal hy vol gemaak word.

21 Dood en lewe is in die mag van die tong en hulle wat dit lief het, sal die vrug daarvan eet. Spr. 18:20-21.

Elke mens sal die gevolge dra van sy woorde, want dood en lewe is in die mag van die tong. Aansluitend hierby het Yeshua ook gesê:

36 want Ek sê vir julle dat van elke waardelose woord wat mense praat, sal hulle 'n antwoord moet gee in die oordeelsdag,

37 want deur jou woorde sal jy onskuldig beskou word en deur jou woorde sal jy skuldig bevind word." Matt. 12:36-37.

Die Torah oor geloftes en eedswering bevestig die belangrike rol wat die man as die hoof van die huis het! In die verhouding wat deur die huwelik tot stand kom, het beide man en vrou 'n spesifieke rol om te speel en 'n bydrae om te lewer volgens יהוה se plan. Die fondament waarop hierdie rolverdeling gebou word, is egter die feit dat יהוה die man as die hoof van die vrou aangestel het en dat die vrou derhalwe aan haar man onderdanig moet wees.

Dit is יהוה se gesagsorde en Sy gedelegerde gesag aan die man is nie op verdienste gegrond nie! Alvorens 'n man in die huwelik tree moet hy derhalwe seker wees dat hy verstaan wat hierdie verantwoordelikheid behels en dat hy bereid is om dit te aanvaar. יהוה-God hou die man aanspreeklik ongeag of die man יהוה as God en Yeshua as die gedelegerde gesag erken of nie.

Deel van יהוה se gedelegerde gesag wat aan die man as hoof van sy huis gegee is, is die vetoreg (kanselleringsreg) oor 'n gelofte of eedswering of dit wat onverskillig uitgespreek is deur sy vrou of dogter.

Volgens Num. 30:3-5 het die vader die gesag om sy ongetroude dogter se gelofte en eedswering tot niet te verklaar, maar hy moet dit doen op die dag wat hy daarvan hoor.

3 Wanneer 'n vrou aan יהוה 'n gelofte gedoen het of haarself tot iets verbind het terwyl sy jonk was in haar vader se huis

4 en haar vader van haar gelofte hoor of van die verbintenis waartoe sy haarself verbind het en haar vader oor haar stilgebly het, dan sal al haar geloftes staan en elke verbintenis waartoe sy haarself verbind het, sal staan,

5 maar as haar vader haar verbied op die dag dat hy daarvan hoor, sal geen van haar geloftes en verbintenisse waartoe sy haarself verbind het, staan nie en יהוה sal haar vergewe omdat haar vader haar verbied het

Indien hy dit nie doen nie, sal die dogter se geloftes en eedsweringe van krag bly en sal sy dus aanspreeklik gehou word.

Volgens Num. 30:6-14 geld dieselfde ten opsigte van die getroude vrou:

¹²As haar man die dinge uitdruklik verbreek op die dag dat hy daarvan hoor, sal niks van alles wat oor haar lippe uitgegaan het, van haar geloftes of van dit waartoe sy haarsalf verbind het, staan nie; haar man het dit verbreek en יהוה sal haar dit vergewe.

¹³ Elke gelofte, elke eed en elke verbintenis om haarself te verneder; haar man sal dit laat vasstaan, of haar man kan dit vernietig. Num. 30:12-13.

Sou die vader egter op 'n later stadium van mening verander en sy kanselleringsreg dan gebruik, is dit te laat en sal hy aanspreeklik gehou word vir sy vrou en dogter se skuld van geloftes en eedsweringe wat nie nagekom is nie!

¹⁴ As haar man van dag tot dag heeltemal stilbly teenoor haar, dan het hy al haar geloftes en alles waartoe sy haarself verbind het, bevestig; hy het dit bevestig, want hy het stilgebly teenoor haar op die dag dat hy daarvan gehoor het.

¹⁵ As hy dit duidelik tot niet maak nadat hy daarvan gehoor het, dan dra hy haar skuld.” Num. 30:14-15.

Hierdie gedelegerde gesag het יהוה aan die eggenoot en vader gegee om sy vrou en dogter te beskerm teen onverskillige geloftes en eedsweringe!

Ons moet verstaan dat יהוה sal altyd Sy gedelegerde gesag eerbiedig en kan nie omseil word nie. Daarom moet die vrou aan haar man en die dogter aan haar vader onderdanig wees, want hy is יהוה se aangestelde gesag.

יהוה se onderrig oor geloftes en eedswering gee vir ons ook insae in die hoedanighede van Vader-God. Indien יהוה ons opdrag gee om te handel volgens ons geloftes en eedsweringe, dan beteken dit dat Hy ook getrou sal wees aan al Sy geloftes en eedsweringe. Dit wat יהוה gespreek het staan vir ewig vas en hy is wakker oor Sy Woord om dit te volbring (Jer. 1:12). יהוה is nie 'n mens dat Hy sal lieg nie (Num. 23:19) – dit wat Hy spreek sal Hy waar maak!! By die Vader van Lig is daar geen verandering of skaduwee van omkering nie (Jak. 1:17).

'n Gelofte en 'n eedswering is vir ewig van krag. Daarom sê dit in Num. 30:2 dat ons nie ons woord mag breek nie, maar moet handel volgens die woorde wat uit ons mond uitgaan.

Voorbeeld uit die Skrifte

In Rigters 11:30-40 lees ons van die gelofte wat Yiftag gemaak het voordat hy in 'n oorlog met die Ammoniete betrokke geraak het:

³⁰ Yiftag het 'n gelofte aan יהוה gedoen en gesê: “As U waarlik die seuns van `Ammon in my hand gee,

³¹ dan sal dit wees dat wat ook al uitkom uit die deure van my huis om my te ontmoet, as ek in vrede terugkom van die kinders van `Ammon, aan יהוה sal behoort en ek sal dit as 'n brandoffer offer.” Rigters 11:30-31.

יהוה het die Ammoniete in die hand van Yiftag gegee en hy het hulle verslaan. Maar dan lees ons:

³⁴ Toe Yiftag in Mitzpah by sy huis kom, let op, het sy dogter uitgekom om hom te ontmoet met tamboeryn en dans. Sy was sy absoluut enigste kind; behalwe vir haar het hy geen seun of dogter gehad nie.

35 Toe hy haar sien, skeur hy sy klere en sê: “Ag, my dogter! Jy laat my baie laag neerbuig en jy is tussen hulle wat vir my moeilikheid bring, want ek het my woord aan יהוה gegee en ek kan dit nie terugtrek nie.” Rigters 11:34-35.

Dat ‘n gelofte en eedswering bindend is, is duidelik volgens die woorde van Yiftag aan sy dogter: “Jy laat my baie laag neerbuig en jy is tussen hulle wat vir my moeilikheid bring, want ek het my woord aan יהוה gegee en ek kan dit nie terugtrek nie”. Maar dit is ook duidelik volgens die woorde van sy dogter aan hom toe sy gesê het:

“My vader, u het u woord aan יהוה gegee; doen aan my soos u gesê het, aangesien יהוה u gewreek het op u vyande, die seuns van `Ammon.” Rigters 11:36

Stilswye

In Num. 30:4, 7 en 14 leer ons dat stilswye gelykstaande is aan goedkeuring en eenstemmigheid. Verwysend na Pingas se optrede volgens Num. 25:6-9 kan ons dan wel die vraag vra: Hoekom het die aangestelde leiers van Yisra’el nie opgetree nie? Het daar by hulle die ywer vir יהוה ontbreek?

Die betekenis van stilswye word ook soos volg deur Rabbi Ovadiah Sforno verduidelik:

When a person has the ability to protest and remains silent, his silence is similar to verbal consent. When you do not say something to disagree, it is as if you agree with what was said or done. Very often, someone might say something in your presence that is improper and you feel that you cannot really influence the person to change his mind or to stop what he is saying. Should you speak up or remain silent?

Whenever your silence can be understood by others as agreement with what was said, you have an obligation to speak the truth. This way no one will mistakenly think that you agree with what was said.

Moreover, you can never tell; perhaps you will be successful in influencing others to make positive changes. A person who is not very assertive might find this difficult. However, learn from the person who says things that should not be said. If he is able to say something that he shouldn't, you certainly have a right to say those things that should be said. If he is not afraid to say something improper, you should have the courage to speak up out of idealism!

Wedergeboorte

Wedergeboorte is ook ‘n gelofte en eedswering wat ons elkeen gemaak het.

9 As jy met jou mond ons Meester, Yeshua, verklaar en met jou verstand, wil en emosie vertrou dat God Hom uit die dood uit opgewek het, sal jy lewe hê,

10 want die verstand, wil en emosie wat in Hom vertrou, is onskuldig verklaar en die mond wat Hom bely, lewe. Rom. 10:9-10

Die dag toe ons met ons mond bely het, en met ons hart geglo het dat Yeshua dié Gesalfde Een is wat gekruisig was en uit die dood opgestaan het, het ons vrywillig ‘n gelofte en eedswering gemaak om in alles aan יהוה gehoorsaam te wees soos in Yeshua volbring is. Ons elkeen het dit gedoen in die teenwoordigheid van die hoogste gesag wat as getuie teenwoordig was.

Met wedergeboorte ontvang ons die gesag wat Yeshua aan Sy studentevolginge (dissipels) gegee het toe Hy aan hulle gesê het:

18“Alle outoriteit in die hemel en op aarde is aan My gegee en soos die Vader My gestuur het, so stuur Ek julle.

19 Gaan daarvolgens, maak studentevolginge van al die nasies, doop hulle in die Outoriteit en Karakter van die Vader en die Seun en die Gees van Afsondering

20 en onderrig hulle sodat hulle alles sal gehoorsaam wat Ek julle beveel het en let op, Ek is saam met julle al die dae tot aan die einde van die heelal. Dit is waar.” Matt. 28:18-20.

Met wedergeboorte word ons aangestel as studentevolginge en met hierdie aanstelling ontvang ons ook die opdrag en die outoriteit wat Yeshua aan elkeen van hulle gee. Dit is deel van die gelofte en eedswering wat ons elkeen afgelê het, naamlik dat ons voortaan sal lewe soos Yeshua gelewe het:

3 Hieraan weet ons dat ons Hom ken, as ons Sy opdragte uitvoer.

4 Hy wat sê: ‘Ek ken Hom’ en Sy opdragte nie uitvoer nie, is ’n leuenaar en die waarheid is nie in hom nie,

5 maar wie ook al Sy woorde voortdurend uitvoer, in hom het die liefde van God waarlik volmaak geword, want hieraan weet ons dat ons in Hom is:

6 hy wat sê dat hy voortdurend in Hom bly, vir hom is dit nodig om so te leef soos wat Hy geleef het. 1Joh. 2:3-6.

Bepens of Bespreek

1. Is die geloftes en eedswering van ons ouers en grootouers ook ewig van krag en word ons as nageslag deur dit gebind indien hulle dit nie nagekom het nie? Volgens sommige is dit bloedlynvloek! Is dit waar? Verwys Ex. 20:5.
2. Het Yiftag sy dogter as brandoffer aan יהוה geoffer? Is ‘n menslike brandoffer vir יהוה aanvaarbaar of is dit ‘n gruwel (Lev. 18:21)? Is die antwoord volgens Rigters 11:37-40 die feit dat sy nooit getrou het nie en dat Yiftag se nageslag by sy dogter geëindig het? Is dit die offer wat Yiftag gebring het?
3. Elke woord wat ons spreek is saad wat gesaai word. Dit “ontkiem” en elke gesaaide woordsaad sal uiteindelik vrugte voortbring. Hierdie vrugte sal of goeie of slegte vrugte wees afhangende of dit goeie of slegte woorde was wat uit die mond gekom het. Daarom het ons almal genesing van die tong nodig, want hoe dikwels is ons woorde saad wat die vrugte van dood voortbring? Ons kies lewe of dood deur die woorde van ons mond! Verwys Jak. 3:1-12 – beheersing van die tong.
4. Wat van die weduwee wat geloftes en eedsweringe maak (Num. 30:9). Sy staan onder geen gesag van ‘n man nie. Is יהוה haar ‘man’ en ‘vader’ en moet sy op die Afgesonderde Gees vertrou om haar te herinner aan onverskillige geloftes en eedsweringe sodat sy direk by die Vader om vergifnis kan vra?

-0-0-0-0-0-0-0-0-

Ontvang יהוה se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom!

Johan.

Epos: kontak@nuweliëd.info

Webwerf: <http://www.nuweliëd.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.